



Sabtu, 16 April 2022

Ogen: Matius 27:62-66



Kuburen Jesus Ijaga



Kejahaten tuhu-tuhu ndemi pusuh imam-imam si mbelin ras kalak Parisi. I bas kejahatan e ersada kal arihna. Ndekahkal penginget imam-imam ras kalak Parisi kai si pernah ikataken Jesus. E me kerna Anak Manusia si la banci lang arus mate tapi i bas wari peteluken ipekeke Dibata i bas si mate nari. Si tuhuna kalak e enggo ietehna kai si nandangi jadi, tapi ersura-sura kal ia ngambati si enggo ipadanken Dibata e. Ngasup kin manusia ngolang-ngolangi si ipadanken Dibata? Uga kal nge gegehna manusia e bandingkan ras gegeh Dibata?

Labo la iangka imam-imam kerna si e, saja enggo kin meganjang ukurna, la ia nggit ngakui kuasa si lit i bas diri Jesus e. La iakuina Jesus e anak Dibata. Jesus e nina anak manusia ngenca, anak Jusuf ras Maria, anak tukang kayu i kuta Nasaret nari. Situhuna labo Ia kalak si meherga ras mehaga. E me dalanna la ia nggit ngakui Jesus e anak Dibata. E maka erpekat imam-imam e ras kalak Parisi lako ndarami kesalahen Jesus amin pe enggo mate. Mbiar kal ia jadi bagi si ikataken Jesus, sabap sanga nggeluh denga Jesus rusur Ia erbahan tanda sengget, si la ngasup imam-imam ngelakokensa. Tanda sengget e erbahansa enterem kalak ngikutken Jesus ras nadingken imam-imam e.

E pe jadi alasen la teralokensa Jesus e. Lit biak percian i bas kelompok enda duana. Biak kejahatan e ipebelinna bas pusuhna si erbahansa tambur pengangkanna kerna kuasa Dibata lebihen asa kuasa kai pe si lit i doni enda. Perukurena terjeng doni ngenca, adi enggo mate lanai mungkin lit kuasaNa. Arah pemetehna ipindokenna man Pilatus gelah kuburen e ijaga, tempa gegehen kuasa Pilatus asa kuasa Dibata. Sabtu pengarapen mabai kita ermeteruk ukur ras erpengarapen nandangi kuasa Dibata si ngasup ngubahken si la terukuri manusia.